

gressores canonum puniantur, specialiter statuentes, ut quicumque beneficiatus aut officium in ecclesia gerens, in habitu huiusmodi diuinis officijs præsumperit inter esse, pro qualibet uice à participatione prouentuum ecclesiasticorum per mensem nouerit se suspensus, fructusq; illi fabricæ illius ecclesiæ applicentur.

Martinus &c. Decernimus & declaramus, sacro approbante concilio, per decreta, statuta & ordinata, tam lecta in præsentis sessione, quàm concordata cum singulis nationibus eiusdem concilij, & quæ in nostra cancellaria poni uolumus & literas in forma publica sub sigillo uicecancellarij uolentibus literas confici, atque tradidi huic sacro concilio, super articulis contentis in decreto super reformatione fientia, die sabbati trigesima mensis Octobris proxime præteriti, promulgata fuisse, & esse iam satisfactum. Quibus decretis ac statutis sic (ut præmittitur) lectis, reuerendissimus pater dominus Ioannes episcopus Ostiensis sanctæ Romanæ ecclesiæ cardinalis & uicecancellarius, de uoluntate nationum ac ipsius synodi & eorum nominibus (ut asseruit) respondit in hunc modum: De mandato nationum respondeo, quod placent nationibus decreta recitata, & cuilibet nationi placet concordia cum ipsa per dominum nostrum facta, & per præmissa fatentur dicto decreto iam esse satisfactum, non intendentes propterea quod concordata cum una natione, in aliquo alteri nationi afferant præiudicium.

SESSIO QUADRAGESIMAQUARTA.

ANNO, indictione & pontificatu quibus supra, die uero martis decimano mensis Aprilis, Constantiæ in ipsius ecclesia maiori sanctissimo domino nostro papa Martino præsidente, more solito publica sessio solenniter celebrata fuit, serenissimo principe domino Sigismundo Romanorum &c. rege, insignis regalibus induto interessente, pro cuius sessionis introductione reuerendissimus pater dominus Nicolaus Assisinatensis missam de spiritu sancto celebravit, & huiusmodi missa finita, lectisq; letanjs & alijs orationibus legi consuetis, debite peractis, reuerendissimus pater dominus Antonius sanctæ Romanæ ecclesiæ presbyter cardinalis de Chalanco uulgariter nuncupatus, quoddam decretum siue statutum alta uoce legit in hæc uerba:

¶ Decretum de loco futuri concilij proxime celebrandi.

Martinus episcopus seruus seruorum dei, ad futuram rei memoriam. Cupientes ac uolentes decreto huius generalis concilij satisfacere, inter alia disponenti, quod omnimodo generalia concilia celebrentur in loco quem summus pontifex per mensem ante finem huius concilij, approbante & consentiente concilio, deputare & designare teneatur, pro loco dicti proxime futuri concilij celebrandi supradicti, eodem consentiente & approbante concilio, ciuitatem Papiensem tenore præsentium deputamus, & etiam assignamus, statuente & etiam decernente, quod prælati & etiam alij qui ad generalia concilia debent conuocari, tempore prædicto ciuitatem ipsam Papiensem accedere teneatur. Nulli ergo omnino hominum liceat hanc paginam nostre deputationis & etiam assignationis, statuti, decreti & constitutionis infringere, uel ei ausu temerario contraire. Si quis autem hoc attentare præsumperit, indignationem omnipotentis dei, & beatorum Petri & Pauli apostolorum eius, se nouerit incursum. Datum & actum Constantiæ in loco sessionis publicæ, decimo tertio Calendas Maij, pontificatus nostri anno primo. Quo decreto lecto, dominus episcopus Ostiensis cardinalis Viuariensis nomine totius synodi respondit, dominus episcopus Ardecinus de Nouaria, ex parte serenissimi principis Sigismundi Romanorum regis ibidem præsentis & eius nomine idem decretum approbavit & laudauit. Et subsequenter dominus Augustinus de Lance de Pisis legum doctor, sacri consistorij aduocatus, nomine domini nostri papæ dictum locum siue ciuitatem